

COMUNICÂT STAMPE

DE GREGORI A FOLKEST 2012 AL CJANTE "STELUTIS ALPINIS"

"La ai voltade ma il furlan al è cussì biel che no si varès di tradusilu mai"

Udin, ai 16 di Lui 2012- "Voltant par talian la cjançon che fin di piçul o vevi tal cûr, *Stelutis alpinis*, o ai fat une operazion sul confin de coretece parcè che la lenghe furlane e je cussì biele che no varès di jessi mai tradusude. Dal rest chê cjançon e je cetant biele e mi someave un pecjât che ducj no podessin scoltâle e comprendi il sô test e al è par chest che mi soi metût a voltâle".

Cussì Francesco De Gregori îr gnot, prime di sierâ un inmagant concerti in cjastiel a Udin, dôs oris di spettacul cun tocs di repertori populâr in tantis lenghis e dialets di dute Italie.

Ospit di Folkest 2012 insiemit cu la "Orchestra Popolare Italiana" di Ambrogio Sparagna, il "princip" dai cjantautôrs al à regalât al public furlan une serade memorabil, cjantant cun l'amî Sparagna e sierant la scjalute di *Vola, vola, vola* cul toc che De Gregori al veve dedicât ae memorie dal barbe - Francesco De Gregori "Bolla", uficiâl dai alpins e vicecjâf dai osovans - copât a Porzûs tal 1945.

Il grant artist al è duncje tornât in Friûl - al veve partecipât cun grande discrezion ae visite dal president de Republiche Napolitano in Mai propit a Porzûs - in grazie dal leam cun Folkest, il festival internazionâl de musiche folc che propit chest an al à strent cu la ARLeF - Agenzie regionâl pe lenghe furlane un acuardi di colaborazion.

"La musiche dolce di une lenghe fuarte" al è il mes sielzût par siglâ chest acuardi: un mes che il grant De Gregori al à savût interpretâ cuntune profonde capacitât interpretative e artistiche.

Di segnalâ ancje la vôs potente de gurizane Gabriella Gabrielli che e à cjantât "Staimi atents" insiemit a Sparagna.

INFO: 0432 555724